

# CARTA UU JEE NI TEE SAN PABLO APOSTOL NUU ÑAYUU ÑUU CORINTO

**1** Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jnūhun ya. Te ndindúú rí jíin hermano yō Timoteo cátee ri carta yáha cuájeē nuū rohó hermano ñuu Corinto jeē cácanđíje ró Yaā Dios, jíin núu ndíhi róhó jéē cáyíhi ndaha Yaā Dios jeē cáyūcu nńí cáhnu Acaya. <sup>2</sup>Te cáñuhun ni ri jeē Tatá yō Yaā Dios jíin Jítóho yō Jesucristo na sáha ga yā jeē váha róhó te sáha ya jeē coo ndeyí coo síi ni rō.

## **Siquí jeē ní ndoho Pablo jnūndóho**

<sup>3</sup>Na cáhán yō jeē yóhyo cújéhnu Yaā Dios, Yaā cúu Tátá maá Jítóho yō Jesucristo. Chi máá yá cúu Tátá yō jeē cundáhú ni yohó, te níní sáha ya jeē ndúsíi ni yō. <sup>4</sup>Chi sáha ya jeē ndúsíi ni yō siquí táca jnúndóho ndóho yó, náváha suni cuu sáha máá yó jeē ndúsíi ni jnánhan yó jéē cándoho jnūndóho. Chi nájnūhun ni sáha ya jeē ndúsíi ni maá yó, suni súcuan sáha yó jéē ndúsíi ni i. <sup>5</sup>Chi jeē ndóho yó cuehē jnūndóho nájnūhun ni ndoho Cristo, suni súcuan nihīn yō cuehē jnūhun ndusíi ni, sáha Cristo. <sup>6</sup>Jeē

yúcuan núu cándoho ri jnūndóho te súcuan te cuu sáha ri jeē ndúsíi ni rō te quendōo vāha ga anuá rō. Te jeē sáha Yaā Dios jeē ndúsíi ni rī, suu sáha tucu jeē ndúsíi ni maá ró, te quéndōo vāha ga anuá rō. Te súcuan te nihīn rō fuerza jeē cuándeyí ni rō jíin táca jnúndóho nájnūhun cándoho ri. <sup>7</sup>Te cáñuhun ndasí ni rī jeē cúu róhó, chi cájini ri jeē nájnūhun cándoho ró jnúndóho jíin rí, suni súcuan ndusíi ni rō jíin rí sáha máá Yaā Dios.

<sup>8</sup>Hermano, cáacuní ri jeē na cúni rō jijnáhan ró ndese ni candoho ri ichi Asia. Chi yóhyo xeēn jnūndóho ni cajito ri, nde je yajni tuá canda ri, te ni jeni ni rī jeē cuu rī nuú. <sup>9</sup>Te siquí jeē ní cajehnde ni rī cuu rī, te yúcuan ní sáha jeē ní cajecūhun ni rī jeē ma tēnuū rī maá rí chi tú jniñu ri, chi sa suhva Yaā Dios jeē nastécu ndíyí tenuū rī. <sup>10</sup>Chi máá yá ni scácu ruhū jijnáhan ri nuū jnúndóho xeēn jeē jé yajni cuu rī nuú, te suni súcuan scácu ya ruhū vijna. Te ñúhun ni rī jeē suni scácu tucu ya ruhū ichi núú gā. <sup>11</sup>Te suni na chíndéé ñáhán ró rúhū jijnáhan ri jeē cacān tahú rō jehē ri. Chi núu cuehē ñayuu cacān tahú jehē ri, te

suní cuehē i cuu nacuatáhú jehē rí jeē ní sáha ya jeē váha ruhū.

**Jeē ní cucuéeé Pablo quihín  
de ñuu Corinto**

<sup>12</sup>Iyó iin jeē sáha jeē cácusíi ní rí: Chi vāha íyó ní anuá rí jeē váha ndoo te ndaā ní cajica rí nuū ñáyuu ñayiví, te víhyá gā nuū maá ró jijnáhan ró. Chi siquí jeē váha ní Yaā Dios, te ní chindéeé ñáhán yá ruhū, te nasūu síquí jéé ndichí máá rí cúu jeē ní cajica rí súcuan. <sup>13</sup>Te jnūhun cátee rí nuū tāca carta rí, chí máni jeē cúu cahu ró te jecūhun ní rō cúu. Te ñūhun ní rí jeē jecūhun vāha ga ní rō, <sup>14</sup>nájñūhun je cájecūhun ní rō jecu. Te súcuan te cuu cusíi ní rō siquí rí quiví ndíji Jitoho yō Jesús, nájñūhun cácusíi ní rí siquí maá ró.

<sup>15</sup>Te siquí jeē súcuan ní cucáhnu ní rí, te jeē yúcuan ní jeni ní rí jeē núu na quíhín rí Macedonia te jeē rí nuū maá ró xihna gā, návāha cusíi ní rō jeē jécondēhe rí rohó úu jínu núú. <sup>16</sup>Chi ní jeni ní rí jeē jécondēhe rí rohó, te yāha rí quihín rí Macedonia, te jeē nándicó rí Macedonia te ndíji tucu rí nuū rō. Yūcuán na te cuu chindéeé ñáhán ró ruhū jeē quihín rí ichi Judea núú. <sup>17</sup>Te jeē súcuan ní jeni ní rí, ¿te á tée tu nácani vāha ní cúu rí jeē tu ní jéé rí nuū rō, chí naún? ¿A cájeni ní rō jeē cúu rí nájñūhun ñayuu ñayiví jéé yachí cahán jeē cuu, yūcuán na te tuú, chí naún? <sup>18</sup>Tuú chí máá Yaā Dios jíni yā jeē tu cáhán rí jíni ró jeē cuu, te yachí nácahán rí jeē ma cúu. <sup>19</sup>Chi ruhū jíni Silvano jíni Timoteo ní canacani rí jñūhun Jesucristo Sēhe

Yaā Dios nuū rō jijnáhan ró. Te máá yá tu cáhán yā jeē cuu te nacahán tucu ya jeē ma cúu. Chí squícu ya jeē cahán yā. <sup>20</sup>Chi ndíhi jeē ní jéjñūhun Yaā Dios, squícu máá Cristo. Te jeē yúcuan cácahán yō jeē yóhoyo luu cújéhnu Yaā Dios, te cácahán yō Amén, chí ndíhi squícu Cristo Jesús. <sup>21</sup>Te Yaā Dios cúu jeē sáha jeē ruhū jijnáhan rí jíni rōhó jijnáhan ró, cáhiin níhin yó jíni Cristo, te ní sándoo ya yohó jéé cuajníñu yó núu yā. <sup>22</sup>Te suní ní jēhe ya Espíritu yā jeē cóndee ini anuá yō, te cúu ya nájñūhun iin sello jeē steén jeē cúu yó séhe Yaā Dios. Te sáha Espíritu jeē iyó ndáa ní yō jeē cuāha Yaā Dios tahū yō.

<sup>23</sup>Te jeē ná tu jeē rí nuū rō ñuu Corinto, nájñūhun ní jeni ní rí, suu cúu siquí jeē tu ní cúní rí cuxeēn rí nuū rō jeē tu cásáha vāha ró. Te máá Yaā Dios cúu Yaā jíni jeē cahán ndaā rí. Te íyó váha jeē na cúu rí te núu tu cáhán ndaā rí. <sup>24</sup>Te nasūu jéé cácuni rí ndacu níhin rí jniñu nuū rō siquí jñūhun cácandíje ró yá, chí je cáhiin níhin ro jíni jñūhun ún. Chí sa suhva cácuni rí chindéeé ñáhán rí rohó jéé na cúsi gā ní rō.

**2** Núu súcuan te ní jeni ní rí jeē ma jéé rí inga jínu nuū rō jíni jñūhun cuxeēn rí te cucuíhyá ní rō sáha rí. <sup>2</sup>Chi núu cucuíhyá ní rō sáha rí, ¿te ndé ñáyuu sáha jeē cusíi ní maá rí? Tuá na inga ñayuu, chí máni máá rōhó, te ndese cuu te núu ní sáha rí jeē cucuíhyá ní rō. <sup>3</sup>Te jeē yúcuan cúu jeē ní tee rí carta un núu rō, návāha nacani ní rō siquí cuéchi ró sáha, te ma cucuíhyá ní rí sáha cuéchi ró quíví jeé rí nuū rō. Chí sa suhva sáha ró jéé cúsi ní rí.

Te jíní vāha ri jeē núu cusīh ni rī, te suni ndīhi ró jínáhan ró cusīh ni rō. <sup>4</sup>Te jeē ní tee ri carta un núu rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní tée ri jeē sāha ri jeē cucuíhyá ni rō, chi sa suhva návāha cuni rō ndese yōhyo manī rī jíní ró.

**Jeē íne cáhnu ni Pablo nuū  
tée ni sāha cuēchi**

<sup>5</sup>Te jeē ní cucuíhyá ni rī ni sāha tēe jeē ni sāha cuēchi ún, te nasūu máá-ni ri, chi suni nde máá ró jínáhan ró ni sāha de jeē ní cacucuíhyá ni rō jecu. Te cáhán ri jeē jecu-ni, chi tu cúní rī cuxeēn ndasí rí. <sup>6</sup>Te jíní jéē ní cacuxeēn rō nuū de ná ni candutútú ró, te jíní yúcuan-ni te ni cuu-ni. <sup>7</sup>Te vijna chi jíní nūhún jeē cóne cáhnu ni rō nuū de, te sāha ró jéē ndúsīh ni de, chi sanaa te caa ga cucuíhyá ni de, te ma ndúsīh gā ni de. <sup>8</sup>Núu súcuan te cáhán ndahú rí jíní ró jínáhan ró jéē steén tucu ró jéē iyó mání rō jíní de. <sup>9</sup>Chi jeē siquī jniñu yáha cúu jeē ní tee ri carta un núu rō, návāha coto ndee rī rohó núu cuatáhú váha ró jniñu ndácu ri nuū rō. <sup>10</sup>Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sāha i cuēchi, te sāha ri súcuan siquī jeē manī rī jíní ró jító jínúu Cristo. <sup>11</sup>Chi cánúu cone cáhnu ni yō, chi tu cúní yō jeē nihín Satanás cuēchi siquī yō, chi je jíní vāha yó ndese ndúcú un stáhú yóhó sāha yó cuéchi.

**Jeē tu ní íyo nayúu ni  
Pablo ini ñuu Troas**

<sup>12</sup>Ná ni jehēn rī ñuu Troas jeē nácani ri jñuhun Jitoho yō Cristo,

te vāha ni sāha ya jeē ni íyo modo jeē nácani ri jñuhun ya. <sup>13</sup>Te vésú súcuan te tu ní íyo nayúu ni anuá rī, chi tu ní nínáhan ri jíní hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

**Jñuhun jeē cujéhnu  
ndúu yó jíní Cristo**

<sup>14</sup>Te na cútahú yō nuū Yaā Dios, chi níní ndéca vāha ya yohó cuángoo yó jíní Cristo Jesús, te ndúu yó jíní yá jeē cujéhnu ndasí yá snāā yā poder ndīhi enemigo yā. Te jéjníñu ya yohó jéē scuité núu yó jñuhun ya tēcá-ni lugar, nájñuhun jíté núu ñin xicō asīn. <sup>15</sup>Te cúu yó nájñuhun ñin sūje jeē jeén asīn nuū Yaā Dios sāha Cristo. Te nájñuhun jeē jinú xicō un núu ñáyuu cācu ánuá jíní nuū ñáyuu jnahnū ndetū. <sup>16</sup>Nuū ñáyuu jnahnū ndetū chi cúu yó nájñuhun ñin xicō jeē cúu i sāha, te nuū ñáyuu cācu ánuá chi cúu yó nájñuhun ñin xicō váha jeē cótecu i sāha. Te ni ñin yó ma cánda yó sāha yó jniñu yáha, te núu ma chindéé ñáhán yá yohó. <sup>17</sup>Te ruhū jínáhan ri, tu cásáha ri nájñuhun cásáha cuehē tēe jeē cánducú de nihín de xūhun síquī jñuhun Yaā Dios. Chi sa cánacani ndaā rī jñuhun ya, chi máá Yaā Dios ni tají rúhū, te máá yá jiní jeē cánacani ndaā rī siquī jeē cácdánje ri Cristo.

**Jñuhun siquī contrato jeē**

**3** Te jeē cáchān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jíní nūhún jéē steén rī carta recomendación nuū

rō, chí jéē cacán rī cuāha ró núū rī jijnáhan ri, nájnūhun cásáha sava i?

<sup>2</sup>Tuú chi máá-ni ró cácuu nájnūhun iin carta recomendación rī. Te jeē ñūhun ni rī jeē ní cacandíje vāha ró ni sáha ri, suu cúu nájnūhun jeē yosó jnūhun carta un ini anuá rī. Te ndíhi ñayuu chi nájnūhun cáhu i, cúu jeē jiní i ndese ni nasāma ró. <sup>3</sup>Chi máá ró cácuu nájnūhun iin carta jeē ní tee Cristo te cáscaca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núū tabla yuū nájnūhun ni tee ya ley yā, chi sa suhva nuū anuá ñayuu ni tee ya.

<sup>4</sup>Te cácahān rī súcuan, chi cácuacáhu ni rī Yaā Dios siquī jeē ni sáha Cristo. <sup>5</sup>Te nasūu jéē cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu squícu ri. <sup>6</sup>Te máá yá ni sáha jeē cuu cuajniñu vāha ri siquī contrato jeé yá. Te contrato yáha tu cáhān jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máá Espíritu cúu jeē cótecu yō níf cáni.

<sup>7</sup>Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni kujéhu, te ni ndindēe ndasí ni sáha, te nde Moisés ndí nuū de ni sáha. Te tu ní cúu coto vāha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndēe núū de. Te núu súcuan ni kujéhu ndasí ley jeē sáha jeē cuu ñayuu te jnahnū ndetū i, <sup>8</sup>te sa víhyá gā kujéhu ndasí gá jnūhun cotecu yō jeē jéhe Espíritu

nuū yō. <sup>9</sup>Chi núu yōhyo ni kujéhu ley un jéē jnahnū ndetū ñayuu sáha, te sa víhyá gā kujéhu jnūhun jeē ndáhva Yaā Dios cuēchi yó. <sup>10</sup>Chi ley un jéē ní kujéhu nde saá, tuá kujéhu cuítí, siquī jeē kujéhu ndasí gá jnūhun Espíritu jeē iyó vijna. <sup>11</sup>Te núu súcuan ni kujéhu ley jeē ni íyo jecu-ni tiempo, te sa kujéhu ndasí gá jnūhun jeē coo níf cáni.

<sup>12</sup>Te jeē súcuan cáñuhun ni rī, jeē yúcuan cáhiyo téyí ni rī nácani ri jnūhun yáha. <sup>13</sup>Chi tu cásáha ri nájnūhun ni sáha Moisés jeē ní jesi de iin sahma nuū de, návāha tú coto ñayuu Israel ndese cuandahvā jeē ní ndindēe núū de. <sup>14</sup>Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájnūhun jési sahma un núū jeē níjnūni i, te tu cújiyo cuítí. Chi nde jeē candíje i Cristo, yūcuán na te cujiyo. <sup>15</sup>Te suni súcuan nde vijna núu cácahu i tutu ley Moisés, te nájnūhun jeē jési iin sahma nuū jeē níjnūni i. <sup>16</sup>Te jeē násāma ini iin ñayuu quívi i nuū máá Jítoho yō Cristo, yūcuán na te cújiyo-ni jeē jési ún. <sup>17</sup>Chi Jítoho yō cúu máá Espíritu. Te nuū íne Espíritu máá Jítoho yō, yūcuan cúu nuū iyó libre ñayuu jeē tuá yíhi i chíji ley jenahán. <sup>18</sup>Te jeē yúcuan máá yó jijnáhan yó, tuá jési nuū jeē níjnūni yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhu máá Jítoho yō. Te máá yó tāca quívi cuanasāma yó cuandu luu ga anuá yō nájnūhun cáa máá yá. Chi máá Jítoho yō jeē

cúu ya Espíritu, súcuan sáha ya jíin yó.

**4** Núu súcuan te tu ndínuu ni rí cánacani ri jnūhun ya. Chi siquī jeē ní cundáhú ni yā ruhū jijnáhan ri te ni jēhe ya jniñu yáha nuū rí. <sup>2</sup>Te tu cásáha ri jniñu néé jēē cúcanu yō sáha, ni tu cájica cuu ri jíin jnúhun ndíchí stáhú, ni tu cásama ri jnūhun Yaā Dios. Chi sa suhva cácahān rī mání jnūhun ndaā. Te súcuan te cuu cuni tāca ñáyuu ini anuá i jeē cácahān ndaā rí jíto jínúū Yaā Dios. <sup>3</sup>Te núu íyó ñáyuu tu jécūhun ni jnūhun jnama ya yohó jēē cánacani ri, te súcuan cúu nuū mání máá ñáyuu jnahñū ndetū. <sup>4</sup>Te jeē tu cácañdije i, te máá jéxeén jeē ndácu jniñu ini ñayīvi yáha, ní jesi nuū jeē níjnūní i, návāha ma ndíndēe jnúhun Cristo ini anuá i, te ma cúni i jeē yóhoyo luu cújéhnu Cristo, Yaā jeē ínuú cáa jíin Yaā Dios. <sup>5</sup>Te jeē cánacani ri jnūhun, te nasūu jnúhun máá rí, chi sa suhva jnūhun Jitoho yō Jesucristo cánacani ri. Te máá rí chi cácuu ri mozo-ni nuū rō jijnáhan rō jēē siquī jeē maní rí jíin Jesús. <sup>6</sup>Chi ná ni sáha Yaā Dios ñayīvi te ni cahān yā jeē na cúndijin nuū néē. Te suni súcuan ni sáha ya jeē ní cundijin nuū anuá yō jeē cájécūhun ni yō siquī Jesucristo, ndese ndíndēe núū yā, cúu jeē yóhoyo luu cújéhnu ya nájnūhun cúu Yaā Dios.

**Jeē cándiquīn yō jnūhun  
cácañdije yó yá**

<sup>7</sup>Te tāca jnúhun yáha jeē yóhoyo luu cújéhnu, chi nájnūhun jeē ñúhun ini iin quīsi ñuhun. Chi cácuu yó nájnūhun quīsi ñuhun,

chi tú na fuerza yō. Te jeē yúcuan cájini vāha ri jeē maá Yaā Dios cúu jeē jēhe poder siquī jnúhun yáha jeē yóhoyo luu cújéhnu, te nasūu fuerza maá rí cúu. <sup>8</sup>Te jeē yúcuan, vēsú tāca lado cájito ri jnūndóho, te tu sáha jeē ma ndúsiī gā ni rí. Te vēsú cácuuīhyá ni rí siquī jnūndóho, te cáñuhun ni rí jeē quee vāha jniñu ri. <sup>9</sup>Te vēsú cájito xeēn ñayuu ruhū, te máá yá tu stóo ya ruhū jijnáhan ri. Te vēsú cánducú i snāa i ruhū jíin jniñu sáha ri, te ma cúu. <sup>10</sup>Te ndé-ni cúu nuū cuángoo ri, te nájnūhun ni ndoho Jesús jeē ni jíhī yā, suni súcuan cándoho ri jeē jé yajni cuu rí, návāha suni cuu stéén rí fuerza Jesús jeē técu yā ini yiqui cúñu rí. <sup>11</sup>Chi jeē niní cátecu rí, te tāca quíivī je yajni cahni ñayuu ruhū jeē siquī Jesús. Te súcuan te cájito ñayuu jeē técu Jesús ini yiqui cúñu rí jeē cúu. <sup>12</sup>Núu súcuan te ruhū jijnáhan ri, níní cúu jeē jé yajni cuu rí siquī jnúhun ya, te yúcuan sáha jeē cotecu maá rō ní cáni jijnáhan rō.

<sup>13</sup>Te yósó núū tútu ii: Ni candije ri te jeē yúcuan ní cahān rí, achí. Te suni jeē cácañdije máá rí cúu jeē cánacani ri jnūhun ya. <sup>14</sup>Chi cájini rí jeē maá Yaā jeē ní nastécu Jitoho yō Jesús, suni súcuan nastécu yā ruhū, te sáha ya jeē iin cáhnu ni cuiñi ndíhi yó núū yā. <sup>15</sup>Chi tāca jnūndóho yáha cándoho ri návāha coo vāha rō jijnáhan rō. Te súcuan te cayā cuehē gā ñayuu jeē sáha ya jeē vāha i. Yūcuán na te suni yóhoyo cuehē i nacuatáhú i nuū Yaā Dios, te cújéhnu ga yā sáha.

<sup>16</sup>Jeē yúcuan cúu jeē tu ndínuu ni rí, te vēsú cuandíhi fuerza yiqui cúñu rí, te sa suhva cuanduu

fuerza gā anuá rī tāca quívī. <sup>17</sup>Chi jnūndóho jeē ndóho yó ñayívi yáha, tú-ni xeēn cúu, te yachī yāha. Te sáha jeē nihín yō iin tahū jeē cujéhnū yó ní cání jeē cáa ndasí gá vēsú jnūndóho ún. <sup>18</sup>Te tu táñúhún yó nuū tāca jnūndóho jíto yó núu vijna, chi sa suhva táñúhún yó nuū tāca jée váha jeē tu jíto yó núu vijna. Chi tāca jée jíto yó núu vijna, chi yachī ndíhi, te tāca jée tu jíto yó núu, chi coo ní cání.

**5** Chi yiqui cúñu yō jeē ndeé yó ñáyívi yáha, cúu nájnūhun iin vehe jeē náā. Te cájini yō jeē núu na náā, te cuāha Yaā Dios iin yiqui cúñu jeé, te suu cúu nájnūhun iin vehe jeē coo ní cání ichi ándiví. Te nasūú iin vehe jeē sáha ñayuu cúu, chi jeē sáha Yaā Dios cúu. <sup>2</sup>Te níní jée ndeé yó vehe yáha jeē cúu yiqui cúñu yō, te cájitū ni yō sáha, chi yōhyo cúní yō jeē núcūhun yó yiqui cúñu jeé yó nde andiví. <sup>3</sup>Chi jeē núcūhun yó un, te ma cóo máá na anuá yō jeē náā yiqui cúñu yō yáha. <sup>4</sup>Chi níní jée iyó gá yō ini vehe yiqui cúñu yō yáha, te jítu ni yō te cúcuíhyá ni yō. Te nasūu jée cuní yō jeē stóo yó yiqui cúñu yō te coo máá-ni ánuá yō. Chi sa suhva cúní yō núcūhun yó jée jeé, návaha ndahvā yiqui cúñu yō jeē náā, te coo máá jée cótecu ní cání. <sup>5</sup>Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndāā ni yō jeē cuáha Yaā Dios tahū yō.

<sup>6</sup>Núu súcuan te níní cúu jeē cá cucáhnu ni rī. Chi cájini rī jeē níní ndeé gá rī chíji yiqui cúñu yáha, te jíca cúu rī jíin núu ndeé

máá Jítoho yō. <sup>7</sup>Chi vijna chi cá candíje ri jeē iyó yá jíin rí, vēsú ná tu coto ri nuū yā. <sup>8</sup>Te cá cucáhnu ni rī, chi sáha ri cuenta jeē váha ga núu na quénda ri chíji yiqui cúñu yáha te quihín rī condee rī jíin máá Jítoho yō. <sup>9</sup>Jeē yúcuan cúu jeē cá nducú ndéyí rí sáha ri jeē cusíi ni yā jíin rí, vēsú núu ndeé gá rī yiqui cúñu rī chí vēsú núu condee rī jíin yá. <sup>10</sup>Chi cánuú jée ndíhi yó cuiñi yuhu mesa Cristo jeē sándaā yā jniñu yó. Te ná iin ná iin yó níhín yō siquí ndese ni casáha yó, á jée váha chí jée neé, ná ni condee yō chíji yiqui cúñu yō.

**Siquí jeē ndívicoo yó núu jnūhun maní Yaā Dios jíin yó**

<sup>11</sup>Núu súcuan te cá ndiso iyo ri nuū maá Jítoho yō, te jeē yúcuan ndúcú ndéyí rí scandíje ri ñayuu. Te jíiní Yaā Dios jeē cá híyo ndaā rī, te ñúhun ni rī jeē suni súcuan cájini maá ró. <sup>12</sup>Te nasūu jée cá nducú tucu ri cahān rī jeē váha ga tēe cácuu ri, chi sa suhva cástūhun rí jeē cuu cusíi ni rō jeē siquí rī jíjnāhan ri. Te súcuan te cuu stío cuíñi rō nuū ñáyuu jeē cutéyí i siquí ndese cáa ñayuu, te tu sáha i cuenta ndese cáa ini anuá ñayuu. <sup>13</sup>Te va sanaa te cájeni ni rō jeē tēe loco cácuu ri jeē cá cahān rī súcuan. Te siquí jeē cá ndíhvī ni rī jehē Yaā Dios cúu. Te tuú chi cá híyo vāha xiní rī, te jeē yúcuan cájējníñu ri jeē quéndōo vāha ró. <sup>14</sup>Chi siquí jeē ní cundáhú ni Cristo ruhū jíjnāhan ri cúu jeē cánuú nacani ri jnūhun ya. Chi cájini vāha ri jeē ni jíhi mañúhún-ni ya jeē siquí ndíhi yó, te jeē yúcuan nájnūhun ni jíhi ndíhi yó jíin yá.

<sup>15</sup>Chi ni jihī yā jeē siquī ndihi yó návāha tāca yó jéé técu, ma cótecu ga yō jeē sáha yó jéé cuní maá yó, chi sa suhva jeē cuní maá yá jeē ni jihī yā te ni natecu yā jeē siquī yō.

<sup>16</sup>Jeē yúcuan tuá casáha ri cuenta ndese-ni cándāa ñayuu, nájñuhun casáha ñayuu ñayīví. Te vésú súcuan ni casáha ri cuenta siquī Cristo nde saá, jeē iin tēe-ni cúu ya, te vijna chi cájini rī jeē cúu ya Sēhe Yaā Dios.

<sup>17</sup>Chi núu iin ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihi.

<sup>18</sup>Te Yaā Dios cúu jeē sáha ndihi jeē yáha, chi jíin Cristo ni sáha ya jeē ní ndívicoo yó núu jnúhun manī yā jíin yó. Te ni tejníñu ya ruhū jeē cánacani ri jnúhun jeē ndívicoo ñayuu nuū jnúhun manī yā jíin i.

<sup>19</sup>Chi jíin Cristo te ni sáha Yaā Dios jeē ñáyuu ñayīví ndívicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnúhun yáha ndese ndívicoo i nuū jnúhun manī yā jíin i.

<sup>20</sup>Núu súcuan te cácuu ri tēe cájica jniñu maá Cristo. Te jeē cahán rī, te nájñuhun jeē maá Yaā Dios cahán ndahú yá jíin ró. Núu súcuan te cácahān ndahú rī jíin ró jeē cahán Cristo, jeē na ndívicoo ró núu jnúhun manī Yaā Dios jíin ró.

<sup>21</sup>Te Cristo, vésú tú ni iin cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jéé yíhi ndaha Cristo, ni nucondee síquī yō jeē iyó ndāa yō nájñuhun iyó ndāa Yaā Dios.

**6** Núu súcuan te síquī jeē cácuu ri tēe casájniñu jíin yá, te

cácahān ndahú rī jíin ró jeē ma stóo uun ró jnúhun jeē ni sáha Yaā Dios jeē váha róhó.

<sup>2</sup>Chi áchí yá nuū tútu ii:

Maá tiempo cuní maá rī te cuni sóho rī jnúhun cáhán ndahú ró jíin rī.

Te maá tiempo jnáma ri ñayuu, te jnama ri rohó.

Achí yá. Te vijna-ni cúu maá tiempo jeē cuní yā, chi vijna-ni cúu tiempo ni quiji Yaā jnáma yóhó.

<sup>3</sup>Te cánducú rī jeē ma sáha ri ni iin jniñu jeē casi jeē candíje ñayuu, návāha ma cahán i síquī jniñu ndíso ri.

<sup>4</sup>Chi sa suhva cánducú rī jeē ndihi jeē sáha ri, steén jeē cácuu ri tēe cájejniñu nuū Yaā Dios. Jeē yúcuan cájendeyí ni rī jíin jéé ndóho ri jnúndóho, jíin jéé cúmani nuū rī, jíin jéé yíi sáha jíin rī.

<sup>5</sup>Chi ni iyó tǎjni jínu jeē ní cacani i ruhū, jeē ní cachune i ruhū vecāa, jeē ní candonda i síquī rī, jeē ní casájniñu nihin rī, jeē ní cajehni rī mähna maá rī, jeē ní cahīyo ndite ni rī.

<sup>6</sup>Te suni cánducú rī jeē cuajnúhún i ruhū síquī jeē ndoo cájica ri, te cájecūhun vāha ni rī jnúhun ndaā, te cáhīyo paciencia ni rī, te vāha ni rī, te ndéé Espiritu Santo ini rī, te cákundáhú ndije ni rī jnáhan rī.

<sup>7</sup>Te cánacani ndaā rī jnúhun, te poder Yaā Dios íne jíin rī. Te jíin jnúhun ndaā cándahva rī tācá jniñu neé, chi nájñuhun jeē cájejnáhan ri síquī. Chi nájñuhun jeē ndónda un síquī rī te ndónda ri síquī.

<sup>8</sup>Iyó jínu yíñúhún ñayuu jíin rī, te iyó jínu tuú. Iyó jínu jéjnúhún i ruhū, te iyó jínu cácahān i síquī rī. Iyó jínu cácahān i jeē tēe stáhú cácuu ri, te iyó jínu cácahān i jeē tēe

ndaā cácuu ri. <sup>9</sup>Iyó jínu cásáha i nájñuhun jeē tu jíní i ruhū jijnáhan ri, te iyó jínu jeē jiní vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihí rí sáha. <sup>10</sup>Te vēsú iyó jéē cácuuñhyá ni rí, te níní cácusihí ni rí. Te vēsú tēe ndáhú cácuu ri, te sácúcá rí cuehē ñayuu jín jnúhun ya. Te vēsú tú na vé cánevāha ri, te jín maa yá te ndíhi-ni cúu jeē cánevāha ri.

<sup>11</sup>Hermano ñuu Corinto, súcuan cúu jeē cácahān cají rí jín ró jijnáhan ró, chí siquī jeē maní rí jín ró, jeē yúcuan cáchí ndíhi ri ndese cándoho ri. <sup>12</sup>Maa rí jijnáhan ri cácahān cají rí siquī jeē maní ndasí rí jín ró, te maa ró jijnáhan ró sanaa te tu súcuan cúu. <sup>13</sup>Nájñuhun cáhān tatá jín séhe, súcuan cáhān ndahú rí jín ró jeē nájñuhun iyó maní rí jín ró, súcuan na cóo maní tucu ró jín rí.

### Siquī jeē cúu yó templo Yaā Dios

<sup>14</sup>Ma quívi nduu rō jín jniñu néé cásáha ñayuu tu cácañdije, chí ma cúu coo inuú ró jín i. ¿Chi ndese cuu quijnáhan jniñu cásáha ñayuu ndaā jín jniñu cásáha ñayuu tú ndaā? ¿Te ndese cuu coyūcú inuú ñayuu cájica jín luz yā jín ñayuu cájica nájñuhun nuū néé? <sup>15</sup>¿Ndese cuu coo inuú ni Cristo jín Satanás? ¿Te ndese cuu cuiñi cáhnu ñayuu cácañdije jín ñayuu tu cácañdije? <sup>16</sup>¿Te ndese cuu quijnáhan templo Yaā Dios jín ídolo? Chí maa ró cácuu templo Yaā Dios, Yaā técu, chí ndéé yá ini anuá rō, nájñuhun ni cahān yā:

Condee rí ini i te caca cuu ri mēhñú i,

te cuu ri Yaā Dios maá i,  
te cuu i ñayuu maá rí.

<sup>17</sup>Te jeē yúcuan ní cahān gā yā:  
Ma quívi nduu rō jín jniñu néé cásáha i,  
te cusíin ró jijnáhan ró, áchí Jítóho yō.

Te ma jnái ró tāca jéē tú ndaā.  
Yūcuán na te naquihin ri rohó,

<sup>18</sup>te cuu ri Tatá rō jijnáhan ró,  
te cuu ró séhe yíí rí jín séhe síhí rí,  
áchí Jítóho yō, Yaā jnái ndíhi poder.

Achí tutu.

**7** Núu súcuan, ñání maní, cánevāha yó tāca jnúhun yáha jéē ni jéjñuhun ya. Jeē yúcuan na sándoo yó maa yó tāca jéē sajnéhén yiquí cúñu yō jín ánuá yō. Te na cónso iyo yó núu Yaā Dios, te coo ndoo coo ií yō nuū yā jín ndíhi jniñu cúní yā.

### Jeē ní canacani ni ñayuu Corinto siquī cuéchi i

<sup>2</sup>Coo maní rō jín rí jijnáhan ró víi. Chí tu ní sáha ri falta nuū ní ñin ró, te tu ní stívi rí anuá ni ñin ró, te ni ñin ró tu ní stáhú rí. <sup>3</sup>Te nasūu jéē nducú rí cahān rí nuū rō cúu jeē cahān rí súcuan, chí je ni cahān rí jeē yóhyo maní rí jín ró. Te níní ñuhun ni rí rohó, vēsú cuu yō chí cotecu yō. <sup>4</sup>Te cúcáhnu ndasí ni rí rohó jijnáhan ró, te cúsií teyí ni rí jeē siquí rō. Te vēsú cájito rí tāca jnúndóho yáha, te iyó ndeyí ni rí te cúsií ndasí ni rí jeē siquí rō.

<sup>5</sup>Ná ni jengoo ri Macedonia te tu ní iyo nayúu ni anuá rí, chí sa suhva yíí ní iyo jnúndóho jín rí tāca lado. Chí ni iyo jeē ní castáhān

jnáhan jíin rí, te ni cayūhu rí sanaa te caca yátá ñayuu cácanđije. <sup>6</sup>Te Yaā Dios jeē sāha jeē ndúndeyí ni ñayuu cácuuíhyá ni, ni sāha ya jeē ní candundeyí ni rī, chi ni quiiji Tito ni sāha ya. <sup>7</sup>Te ni candusiī ni rī, nasūu máá ĩn-ni siquī jeē ní quiji de, chi suni jeē ní ndundeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jíin jéē cácuuíhyá ni rō jeē siquī cuēchi ró, jíin jéē cánacani ni rō jehē rī. Te jeē yúcuan ní cusīī gā ni rī.

<sup>8</sup>Te carta jeē ní tají rí nuū rō, vēsū ni sāha jeē ní cacucuíhyá ni rō, te tuá nácani cuíhyá ni rī jeē ni sāha súcuan. Chi vēsū ni cucuíhyá ni rī saá, te vijna te tuá, chi jíin rī jeē jecu-ni quivī ni cacucuíhyá ni rō ni sāha. <sup>9</sup>Te vijna te cúsiī ni rī, te nasūu síquī maá jéē ní cacucuíhyá ni rō. Chi cúsiī ni rī jeē ní jejnīñu jeē ní cacucuíhyá ni rō, chi ni sāha jeē ní canacani ni rō siquī cuēchi ró. Chi ni cacucuíhyá ni rō nájñuhun cúní maá Yaā Dios, te nasūu jéē ni sáhuhū rī rohó. <sup>10</sup>Chi núu cúcuuíhyá ni yō nájñuhun cúní Yaā Dios, te suu sāha jeē nácani ni yō siquī cuēchi yó te jnama ya yohó, te ma cóo gā jeē nácani cuíhyá ni yō. Te jeē cácuuíhyá ni ñayuu tu cácanđije, tu jéjnīñu jeē nácani ni i, chi sa jnahñū ndetū i. <sup>11</sup>Te ni cacucuíhyá ni rō nájñuhun cúní Yaā Dios, te vijna te cájito ró náa vāha ni jejnīñu. Chi ni canacani ndasí ni rō ni sāha, te ni canducú ró jeē quéndōo ndaā rō, te ni cacuxeēn rō nuū téē ni sāha cuēchi, te ni cayūhu ró jeē ní castívī ró núū yā. Yūcuán na te yōhyo ni cacuni

rō coto tucu ró núū rī, te yōhyo ni candihvī ni rō ni cacuxeēn rō nuū téē ni sāha cuēchi ún. Te súcuan ni castéēn rō jeē tú cuēchi ró, chi tu ní cájejnūhún ró cuēchi ni sāha téē ún. <sup>12</sup>Te jeē ní tee ri carta un, nasūu máá-ni jeē cúxeēn rī nuū téē ni sāha cuēchi ún, ni nasūu máá-ni jeē cahán rī jehē téē ni ndoho ni sāha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jító jíinúu Yaā Dios. <sup>13</sup>Jeē yúcuan ní candusiī ni rī jeē siquī rō.

Te víhyá gā ni cacusiī ni rī jeē ní jini rī jeē cúsiī ni Tito, chi ni nduu nayúú ini de ni casáha ró. <sup>14</sup>Chi je ni cahán rī jíin de jeē cúsiī ni rī jeē vāha ñayuu cácuu ró, te vijna te tu ní quéndōo ri jñuhun canu jeē siquī rō. Chi nájñuhun ni cajini rō jeē iyó ndaā tāca jñuhun ni cacahán rī jíin ró, suni súcuan ni cundaā jñuhun ni cacahán rī jíin Tito jeē cúsiī ni rī siquī rō jeē vāha cácuícu ró. <sup>15</sup>Te víhyá gā maní de jíin ró vijna jeē ñuhun ni de jeē vāha ni cajetáhú ró jeē cahán de, te ni cahīyo yfñúhún ró ni candiso iyó ró núū de. <sup>16</sup>Núu súcuan te cúsiī ni rī siquī jeē cucáhnu ndasí ni rī rohó jíjnáhan ró.

#### Jeē na cúsiī ni i socō i cuehē

**8** Hermano, vijna te suni cácuuni rī castūhun rí nuū rō jijnáhan ró ndese cuehē jeē vāha ni sāha Yaā Dios jíin ñayuu cácanđije cáyūcú Macedonia. <sup>2</sup>Chi vēsū yōhyo ni jito ndee jñundóho i, te suni yōhyo ni cacusiī ni i jíin jñuhun ya. Te vēsū ñayuu ndahú ndasí cácuu i, te yōhyo vāha ni

cajequin i cuehē xūhun jēē cúu ñayuu ndahú cácanđíje. <sup>3</sup>Chi cúu ri testigo jeē ní cacusiī ni maá i ni cajēhe i ndésaa ni canda i, te nde vihyá gā ni cajēhe i. <sup>4</sup>Chi ni cacahān ndahú ndasí i jíin rí jeē na cuáha ri jñūhun chindéé ñáhán i jíin yó cuāha i xūhún cuu hermano cándoho ndáhú. <sup>5</sup>Te víhyá gā ni casáha i vēsú jeē ní cajeni ni rī, chi xīhna gā ni casocō i maá i nuū Jítóho yō, te sáa te ni cajēhe i maá i sáha i tāca jēē cácuni rī, ndīhi ndese nújnahan ni Yaā Dios. <sup>6</sup>Te jeē súcuan ni casáha ñayuu Macedonia, te ni castíhvī ni rī Tito jeē na jéē tucu de nuū maá ró, sáha de jeē jīnu jniñu jeē ni squéjéé de jíin ró jeē suni caquin rō cuehē xūhún cuu ñayuu ndahú. <sup>7</sup>Chi maá ró yōhyo vāha cásáha ró táca-ni, chi vāha cácanđíje ró, vāha cánacani ró jnúhun, vāha cájecūhun ni rō, vāha cándíhvī ni rō, vāha manī rō jíin rí jijnáhan ri. Núu súcuan te suni cánuú sáha vāha ró jniñu yáha jéē cuáha ró jéē cúu ñayuu ndahú.

<sup>8</sup>Te nasūu jéē cuní rī ndacu ri jniñu nuū rō, chi sa cástūhun rí nuū rō ndese yōhyo cácusiī ni sava ga ñayuu jéhe i xūhún, te súcuan te cuni rī jeē suni maá ró cákundáhú ndíje ni rō ñayuu ndahú. <sup>9</sup>Chi je cájini rō ndese yōhyo vāha ni Jítóho yō Jesucristo jíin yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví núú. Te súcuan ni sáha ya jeē cá cucucá ró ndīhi jeē ndíso jñūhun ya, siquī jeē ní nasáha ndáhú yá maá yá.

<sup>10</sup>Te jeē váha maá ró cúu jeē na cáchi rī ndese jéni ni rī siquī

jniñu yáha. Vāha ni caquejéé ró nde jendujin, chi nasūu maá-ni jeē ní cajequin rō xūhún, chi suni yōhyo ni cacusiī ni rō sáha ró. <sup>11</sup>Núu súcuan te vijna te sínu ró. Te nájnūhun ni cacusiī ni rō ni caquejéé ró jíin, suni súcuan na cúsiī ni rō sínu ró, chi cuāha ró núu ndese cánevāha ró. <sup>12</sup>Chi núu cúsiī ni yō cuāha yó, te jétáhú yá núu ndese névāha yó, chi tu jícan yā jeē cuāha yó jéē tu névāha yó.

<sup>13</sup>Te nasūu jéē cahán rī jeē cáhni ndahú ró maá ró jeē cáa ga nihīn i vēsú jeē ndóo nuū maá ró. <sup>14</sup>Chi sa suhva jeē iin cūhva-ni conevāha ró jíin i. Chi cánevāha cuehē rō vijna, te cuu cuāha ró jéē cúmanī nuū i. Yūcuán na te núu ndé iin quivī conevāha i, te suni cuu cuāha i te núu ni cumani nuū rō. Te súcuan te iin cūhva-ni conevāha ró jijnáhan ró, <sup>15</sup>nájnūhun cáhán tutu i siquī ñayuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmani nuū de. Achí tutu.

#### **Jñūhun Tito jíin úu gā jnáhan de**

<sup>16</sup>Te na cútahū rī nuū Yaā Dios jeē ni sáha ya jeē ndíhvī ni Tito jehē rō nájnūhun cándíhvī ni maá rí. <sup>17</sup>Chi ní jetáhú de jeē ní cacahān rī jíin de jeē jeé de nuū rō. Te siquī jeē ndíhvī ni de jehē rō, jeē yúcuán cuájeē de, chi súcuan cúu ni maá de.

<sup>18</sup>Te suni cátají rí iin hermano cuajeē jíin Tito nuū rō. Te tāca grupo ñayuu cácanđíje cájejnúhún i tēe un jéē váha jéjníñu de siquī jnúhun jeē jnáma ya yohó. <sup>19</sup>Te tāca

grupo ñayuu cácanđíje suni ni catee i jniñu siquī de jeē cáca de jíin rí chindéé ñáhán de quindēca de xūhun jíin rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhyo vāha Yaā cúu máá Jítóho yō, chi cuni i ndese yóhyo cácusī ni rō cásocō rō xūhún. <sup>20</sup>Te quingoo ndindúú rí návāha ni iin ñayuu ma tée i cuēchi siquī rī siquī xūhun cásocō ñayuu. <sup>21</sup>Chi ndúcú rí jeē squícu ndaā rī tācá jniñu, nasūu máá iin-ni nuū Yaā Dios, chi suni nuū ñáyuu.

<sup>22</sup>Te suni cátají rí inga hermano yō cuajeē de jíin ndindúú tée yáha. Te tijní jíinu ni steén de jeē yóhyo cúsi ni de ndíhví ni de tācá jniñu. Te vijna chi ndíhví gā ni de jehē rō, chi cúcáhnū ndasí ni de jeē cásquícu rō. <sup>23</sup>Te núu cácajnūhún ñayuu siquī Tito, te achi rō jeē cúu de tēe chindéé ñáhán jéjníñu jíin rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácanđíje, te cáhiyo yíñúhún de nuū Cristo. <sup>24</sup>Núu súcuan te stéén rō nuū de jeē cáhiyo maní ndije rō jíin de, návāha na cúni tāca grupo ñayuu cácanđíje. Te súcuan cuni i jeē tu ní cácusī cāhá ni rī siquī rō.

#### Siquī jeē cájequin i xūhún cuu tācá hermano

**9** Te vijna te tuá jíni ñúhún tee rí nuū rō siquī xūhun jeē cájequin rō cuu tācá hermano cándoho ndáhú. <sup>2</sup>Chi je jíni rí jeē cánujnahan ni rō cuāha rō. Te jeē yúcuan máni cúsi ni rí cahán rí jíin ñáyuu Macedonia jeē rohó ñáyuu Acaya, je ni casátūhva

ró xūhun ndé jendujin. Te jeē súcuan ni cacusi ni maá rō, te jeē yúcuan cuehē ñayuu Macedonia ni cacondíhví ni i ni cajēhe máá i. <sup>3</sup>Te tájí rí ndinúni hermano yáha cuajeē maá de nuū rō xihna gā, návāha jeē jinú maá rí te ma quéndōo néé rí siquī jnúhun ni cahán rī jeē squícu vāha rō jíin jniñu ún. Chi coo tūhva ndije rō jíin xūhun nájnūhun ni cahán rī jíin i. <sup>4</sup>Chi sanaa te jecoo jecu tēe Macedonia jíin rí, te núu cuni de jeē tu cáhiyo tūhva rō, te coo jnūhun canu nuū rī, te suni nuū maá rō jijnáhan rō, chi ni cahán teyí rí jeē cáhiyo tūhva ndije rō. <sup>5</sup>Jeē yúcuan ní jeni ni rī jeē cánuú cahán rī jíin tāca hermano yáha jecoo de xihna gā, te sáá te jinū rī, návāha stíhví ni de róhó jéé yáchí na cóo tūhva xūhun jéé ní cacahán rō jeē cuáha rō. Te súcuan te coo tūhva siquī jeē vāha ni rō, te nasūu jéé safuerza rī rohó.

<sup>6</sup>Cocuhun ni rō jnūhun yáha, jeē núu jecu-ni cuāha rō te suni jecu-ni nanihín rō: Chi tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu. <sup>7</sup>Tācá iin iin rō cuāha rō ndésaa ni tee ni rō. Ma cúxii ni rō cuāha rō, chi nasūu fuerza cúu. Chi Yaā Dios maní yā jíin ñáyuu jeē cúsi ni cuāha. <sup>8</sup>Te máá Yaā Dios cuu sáha ya jeē nducuehē ndinuū jeē vāha cuu rō jijnáhan rō, návāha níni conevāha rō ndíhi tācá jeē jíni ñúhún rō, te coo sobra gā jeē cuāha rō jéé cúu tācá jniñu vāha. <sup>9</sup>Chi súcuan cáhán tutu i siquī tāca ñáyuu jéhe:

Ni scáa i ni jéhe i nuū ñáyuu ndahú.

Te tācá jniñu váha sáha i, chi quendōo níí cáni.

Achí tutu. <sup>10</sup>Te Yaā Dios jéhe ya tata nuū tēe táji, te nihin de staā jeē caji de. Te suni súcuan cuāha ya ndinuū jeē váha cuu ró, te sáha ya jeē cāyā te nducuehē jniñu váha cāsáha ró. <sup>11</sup>Súcuan cucúcá ró jíin táca-ni, návāha cuu cuāha cuehē rō. Te xūhun jēe cuāha ró quíhīn nuū hermano cándoho ndáhú, suu sáha jeē nácuatáhú i nuū Yaā Dios. <sup>12</sup>Chi xūhun jēe cuāha ró núu i, nasūu máá iin-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. <sup>13</sup>Te cahān i jeē yóhoyo vāha Yaā cúu Yaā Dios, chi xūhun jēe ní cajēhe ró stēen jeē váha cācandíje ró jnúhun Cristo. Te suni sáha jeē cahān i jeē yóhoyo cújéhnu Yaā Dios siquī jeē ní cajēhe cuehē rō nuū i jíin núu sava ga ñayuu. <sup>14</sup>Te suni cacān tahú i jehē rō, chi coo manī ndasí i jíin ró siquī jeē yóhoyo vāha ni sáha Yaā Dios jíin ró. <sup>15</sup>Te na cútahū yō nuū Yaā Dios, chi ni jēhe ya Sēhe ya nuū yō, jeē cúu iin tahū cáhnu ndasí jēe ma cánda cuiti yō castūhún ndihí yó.

**Jeē ndíso jniñu Pablo cúu de apóstol**

**10** Te ruhū Pablo, cáhán ndahú rí jíin ró jijnáhan ró jíin modo maá Cristo jeē vitá ni yā te vāha ni yā. Ruhū, chi cācāhān rō jeē iyó suchí ni rí núu ndéé rí jíin ró, te núu ndéé jíicá rí te tu yúhú cuiti rí cahān nihin rí jíin ró, cācāhān rō. <sup>2</sup>Núu súcuan te cáhán ndahú rí jíin ró jeē núu na jéé rí te ma cahān rō jnúhun jeē sáha jeē cuxeēn rí nuū rō. Chi sava ró cācāhān jeē casáha ri jniñu

ya siquī jeē máni jeē na níhín rí siquī ún. Núu súcuan te íyó túhva rí cuxeēn rí nuū ñayuu cācāhān súcuan. <sup>3</sup>Chi vēsú cácuu rí ñayuu cāyūcú ini ñayiví, te tu cājejnáhan rí modo cājejnáhan ñayuu ñayiví. Chi nájnūhun jeē cājejnáhan rí siquī tācá jniñu neé. <sup>4</sup>Chi nasūu ndajniñu ñayiví jéjníñu rí cājejnáhan rí, chi jíin poder Yaā Dios cājejnáhan rí snāā rí tāca fuerza jeē cúu contra siquī yā. <sup>5</sup>Súcuan cāsnaā rí tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cājesi rí nuū ndihí jeē tú vāha jeē cājeni ni ñayuu, návāha cuandetū i nuū Cristo. <sup>6</sup>Te jeē jínu cuandetū vāha máá ró, yūcuán na te coo túhva rí cuāha rí castigo nuū tāca gá ñayuu jeē tu cājendetū.

<sup>7</sup>Máá ró jijnáhan ró máni cājeni ni rō modo ñayuu tu cājecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. <sup>8</sup>Te núu ni cahān teyí rí jíin ró jeē ndíso jniñu rí, te tu cúcanu rí sáha. Chi máá Jítóho yō ni tejníñu ya ruhū jijnáhan rí, návāha sáha rí jeē ije ánuá rō jíin jnúhun ya, nasūu jēe snāā rí. <sup>9</sup>Núu súcuan te tu cúni rí jeē cáni ni rō jeē nducú rí siúhú rí rohó jíin carta rí. <sup>10</sup>Chi cācāhān sava ró jéé tāca carta rí yóhoyo stíhví ni te nihin ndácu jniñu, te sa suhva núu ndéé rí jíin ró te tu cúndeyí ni rí ndacu nihin rí jniñu, te suni tu cúu cahān vāvihí rí, achí ró. <sup>11</sup>Te ñayuu cācāhān súcuan na sáha i cuenta jeē nájnūhun nihin cáhán carta rí jeē íne jíicá rí, suni súcuan nihin

ndacu ri jniñu nuū rō jeē cóndee rī jíin ró.

<sup>12</sup>Te va ma chúndeyí cuiti ni nde ri jeē sajeñhu ri maá rí, nájñuhun cásáha sava tēe un jēē cájejnúhún nde de máá de. Tāca tēe ún chi cācunéé de jeē cájeni ni de jeē cujéñhu ga de vēsú jnánhan de, te tu cásáha de cuenta ndese cúní Yaā Dios jeē caca de. <sup>13</sup>Te ruhū jijnánhan ri, chi cutéyí nde ri maá cūhva-ni jniñu jeē ni jēhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jēhe jñuhun jeē ni jínū rī nuū rohó ñáyuu ñuu Corinto. <sup>14</sup>Jeē yúcuan ná ni jinūcoo ri nuū rō jeē xíhna ñíhún te nasūu jēē ni yáha ri nuū cūhva jniñu ní jēhe ya nuū rī. Chi xíhna gā maá rí ni jinūcoo nuū rō ni canacani ri jñuhun vāha Cristo. <sup>15</sup>Te tu cācutéyí rí siquī jniñu ní casáha inga tēe, nájñuhun jeē jniñu máá rí cúu. Chi sa suhva cāñuhun ni rī jeē cuehē gā candíje ró, te sūcuan te cuu sáha ri cuehē gā jniñu ya mēhñu ró, te níni máá cūhva jeē ni jēhe ya nuū rī. <sup>16</sup>Yūcuán na te cācuni ri scuité núu ga rī jñuhun jnáma ya yohó núu tāca gā ñuu yúcu ndé yūcuan gá. Te sūcuan te ma quívi nduu rī cutéyí rí nuū jeē jé ni canacani inga tēe jñuhun.

<sup>17</sup>Te núu ndé tēe cúní de cutéyí de, na cutéyí de siquī jeē sáha máá Jítóho yō, nasūu síquī jēē sáha máá de. <sup>18</sup>Chi nasūu tēe jeē jejnúhún máá cúu jeē quéndoo yíñúhún, chi sa suhva tēe jeē jejnúhún máá yá.

**Jeē cahán Pablo siquī tēe canacani jñuhun stáhú**

**11** Cone cāhnu ni rō jijnánhan ró jeē cahán rī jecu jñuhun

modo nájñuhun cācahān ñayuu canéé. Núu sūcuan te cāhnu coo ni rō víi. <sup>2</sup>Chi cúcuñí rí jehē rō jijnánhan ró, nájñuhun cúcuñí Yaā Dios. Chi cācuu ró nájñuhun iin sūchi síhí íyó ndoo, te ni sáha ri jeē quijnánhan ró jíin Cristo, nájñuhun quíjnánhan iin sūchi síhí jíin máñúhún-ni yíi i. <sup>3</sup>Te yúhú rí sanaa te cuāha ro jñuhun stáhú tāca tēe un rōhó, te siáá rō jñuhun jeē chiñúhún ndāá rō Cristo nde jíin ini jíin ánuá rō. Chi suni sūcuan ni sáha Satanás jíin Eva, chi ni quívi ini iin coō, te ni stahú un ña jíin jñuhun ndíchí stáhú. <sup>4</sup>Chi núu quíjicoo tēe nuū rō jeē tu cānacani ndaā de jñuhun Jesús nájñuhun ni canacani ri nuū rō, te va yōhyo vāha cājetáhú nde ró de. Te suni sūcuan vāha cājetáhú nde ró núu inga espíritu jíin núu inga jñuhun jeē tu quíjnánhan jíin Espíritu jíin jñuhun jeē ní cacandíje ró jēē jnáma ya rohó. <sup>5</sup>Te tāca tēe cācandíje ró un jēē cācahān jeē apóstol cujéñhu ga cācuu, tú cuiti jeē cujéñhu ga nde de nuū rī. <sup>6</sup>Chi vēsú tu níhín vāha nde ri modo cahān rī, te jécūhun vāha ni rī. Chi jíin ndíhi jniñu ni casáha ri mēhñu ró ni castéén cají rí nuū rō jeē sūcuan cúu.

<sup>7</sup>Tu ní jíicán rí xūhun núu rō siquī jeē ní nacani ri jñuhun jnáma ya yohó. Te sūcuan ni cotecu ndahú rí návāha quendōo vāha ga maá ró jíin jñuhun ya. ¿Te va cuēchi ni sáha ri jeē ni sáha ri sūcuan, chí naún? <sup>8</sup>Chi sava ga grupo ñayuu cācandíje ni quihín ri xūhun jēē ní cajēhe i nuū rī, návāha sūcuan-ni nacani ri jñuhun ya nuū rō jijnánhan

ró. <sup>9</sup>Te ná ni condee rī jín ró te ni ndíhi xūhun rí, te tu ní jícán cuiti rī nuū ní ìn ró. Chi hermano jeē ní quijicoo ichi Macedonia ni cajēhe de nuū rī jeē cúmani. Te jeē súcuan tu ní stáhān rī rohó, te ni ma sáha cuiti rī. <sup>10</sup>Te nájnūhun cúcáhnū vāha ni rī jeē jíní rī jnūhun ndaā Cristo, suni súcuan jíní rī jeē ma quíhin rī xūhún nuū ni ìn ñayuu ñí ndáñū Acaya, návāha ma cási i jeē cúsiñ ni rī jeē súcuan-ni nácani rī jnūhun ya. <sup>11</sup>¿Te á síquī jeē tú manī rī jín ró cúu jeē cahán rī súcuan, jéni ni rō, chí naún? Tuú chi máá Yaā Dios jiní yā jeē manī rī jín ró jijnáhan ró.

<sup>12</sup>Te sáha ri ná-ni sáha ri, chi ma quíhin rī xūhun ró, návāha casi rī nuū jeē casátéyí tēe un máá de jeē cácahān de jeē inuú casáha de jniñu ya jín rí. <sup>13</sup>Te tēe ún chi nasūú apóstol ndaā cácuu de, chi máni máá jnúhun stáhú cácahān de, te casáha de máá de jeē cácuu de apóstol Cristo. <sup>14</sup>Te tu náā ni yō jító yó jēe casáha de súcuan, chi je jíní yō jeē suni Satanás násama máá te stáhú jēe sáha máá nájnūhun ìn ndajéhé Yaā Dios jeē jica jín luz yā. <sup>15</sup>Te jeē yúcuan suni tu náā ni yō jító yó jēe tēe cájejniñu nuū Satanás, casáha de máá de jeē tēe ndaā cácuu de. Te ìn quivī te nanihin de síquī jniñu née casáha de.

### **Jnūndóho ni ndoho Pablo síquī jeē cúu de apóstol**

<sup>16</sup>Enga jínu cáhán rī jín ró jeē ni ìn ró ma cáni ni rō jeē tēe cánéé cúu rí. Te núu súcuan cájeni ni rō, te va cuatáhú nde ró jēe cahán rī nájnūhun tēe cánéé, návāha suni

cúu cutéyí nde ri jecu nájnūhun casáha tēe ún. <sup>17</sup>Jeē cahán rī vijna chi nasūu jēe ní ndacu máá Jítóho yō cúu, chi sa nájnūhun tēe cánéé cáhán rī jeē cutéyí nde ri. <sup>18</sup>Chi cuehē de casátéyí de máá de modo jeē iyó ini ñayiví, te suni súcuan na sátéyí nde ri maá rí núu súcuan. <sup>19</sup>Te va tēe cáhīyo cájí xíní cácuu nde ró, te jeē yúcuan cúu vāha ni nde ró cuatáhú ró ìn tēe cánéé núu súcuan. <sup>20</sup>Chi va vāha-ni cájendeyí ni rō nuū tēe un jēe casáfuerza de rōhó cuajniñu ró núu de, chí casáha de jeē ndundáhú ró, chí cáquende de ndajniñu ró, chí casájéhnū de máá de nuū rō, chí ndé cácatu de nuū rō. <sup>21</sup>Te vēsú cúcanu nde ri cahán rī, te na cáhán rī jeē tu ní cúndeyí ni nde ri satéyí rí maá rí nájnūhun casáha tēe ún.

Te vijna te núu íyó sava tēe chúndeyí ni de sátéyí de máá de, te va suni chunde yí ni nde máá rí núu súcuan. Te va cáhán rī nájnūhun cáhán ìn tēe cánéé. <sup>22</sup>Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. <sup>23</sup>Núu tēe cájejniñu nuū jnúhun Cristo cácuu de, te víhyá gā ruhū. Te va cáhán rī nájnūhun tēe cánéé jēe cutéyí rí súcuan. Chi ni caa ga ni sájniñu rī vēsú maá de jijnáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū. <sup>24</sup>Te jnáhan rī hebreo, uhūn jínu ni cacani xeēn de ruhū jín cuarta ñi, ìn cūhva jeē jé yajni cuu rī sáha. <sup>25</sup>Unī jínu ni cacani de ruhū jín yujnu xí, te ìn jínu

ni cajēhe de yuū xinī rī. Unī jínu ni quēe barco jeē ní jica ri siquī jnūhun ya. Te ĩn jecuáā jíin ĩn ndiáca ni yosō candá rí nuū cunú ndute mar. <sup>26</sup>Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuíhná. Ni cācu ri nuū ñáyuu nación rī jíin núū ñáyuu ñuu jíca. Ni cācu ri cháha chúcuan ná ni iyo ri ñuu jíin rancho jíin mar. Ni cācu ri nuū táca jnáhan ri jeē tu íyó ndáā. <sup>27</sup>Ni sájniñu nihin ri te yí ní ndoho ri. Cuehē jínu ni jehni rī maá rí máhná. Ni jíi rī sōco, ni jichī rī ndute. Cuehē jínu ni iyo ndite ni rī, ni cuijnu rī, ni cumanī sahma ri

<sup>28</sup>Te siquī tāca jēē yáha chí íyó gá. Chi ndiquivī ndóho ri jeē nácani ndasí ni rī jehē tāca grupo ñayuu cácanđije. <sup>29</sup>Núu ĩn ñayuu tu fuerza ini i, te suni ndóho ri jehē i. Te núu ĩn ñayuu quívi i cuēchi sáha jnáhan i, te ndóho ri jnūhun cúcanu jíin jnūhun náxeēn ni.

<sup>30</sup>Núu súcuan te núu cánuú cutéyí nde ri, te va cutéyí rí siquī tāca jēē steén jeē tú na fuerza ini rī. <sup>31</sup>Te Yaā Dios, Yaā cúu Tátá maá Jítoho yō Jesucristo, jíin yā jeē cahán ndaā rī. Te níí cáni na cáhán ñayuu jeē vāha ndasí Yaā cúu ya. <sup>32</sup>Ná ni iyo rī ñuu Damasco, te gobernador jeē ndácu jniñu ndañúū jeē jníí rey Aretas, ni jeni de soldado ni cacondito tāca yéhyí jeē ní condúū ndihyú ñuu ún, chí jnií de ruhū quihīn rī vecāa ni cuni de núú. <sup>33</sup>Te ni quívi ri chíi ĩn jica, te ñayuu cácanđije ni cascúun i ruhū ventana ĩn vehe jeē néne jicā jeē ndihyú ñuu ún. Te súcuan ni cācu ri nuū téé ún.

Jeē ní jito ndijin Pablo  
jeē ní stúu ya nuū de

**12** Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítoho yō nuū rī te ni steén ndijin yā nuū rī. <sup>2</sup>Jíní rī ĩn tēe cándíje Cristo, te je ni cuu uxí cuūn cuiyā jeē ní sáha ya jeē ní caa tēe un ní jehēn de nde andiví úní. Te tu jíní rī núu ni jehēn rī jíin yiqui cúñu rī, chí ní jehēn anuá-ni ri. Máá Yaā Dios cúu jeē jiní. <sup>3</sup>Te jíní rī jeē ní ndonehen ya ruhū. Te á ní jehēn rī jíin yiqui cúñu rī, chí ní ndōo, tu jíní rī, chí máá-ni Yaā Dios cúu jeē jiní. <sup>4</sup>Chi ni sáha ya jeē ní caa ri ni jehēn rī nde jardín andiví. Te yūcuan ní jini sōho ri tāca jnūhun sáhi ndasí jēē ma cúu castūhun yóhó ñáyuu. <sup>5</sup>Te siquī jeē ni sáha ya súcuan jíin rí cúu jeē cutéyí rí, te ma cutéyí rí siquī ndese cúu máá rí. Chí cutéyí rí máni jeē tú na fuerza ini rī. <sup>6</sup>Te núu cúní rī cutéyí rí siquī maá rí nuú, te nasūu jēē canéé rí núu sáha ri súcuan núú, chí ndaā cúu jeē iyó jeē cutéyí rí. Te ni ma sáha ri, chí tu cúní rī jeē cani ni ñayuu jeē cujéhnú ga rī vēsú jeē ní jito i chí jēē ní jini i jnūhun ri.

<sup>7</sup>Te tu cúní yā jeē yáha ri cutéyí rí siquī jeē ni steén ndijin yā jniñu jéhnú ndasí un núu rī, te jeē yūcuan ni quiji ĩn jnūndóho jeē ndiquín ruhū te stóho ruhū. Te ĩn jeē ni jéhe ya jnūhun ni tají Satanás cúu, ĩn jeē stóho ruhū, návāha ma yáha ri cutéyí rí. <sup>8</sup>Te unī jínu ni cahán ndahú rí jíin máá Jítoho yō jeē na téjiyo ya quihīn. <sup>9</sup>Te ni cahán yā jíin rí: Tuú chí tu cúmani

jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiī ni rī jeē tú na fuerza ini rī, chi súcuan te nducuehē gā fuerza Cristo ini rī. <sup>10</sup>Jeē yúcuan cúu jeē cúsiī ni rī jeē tú na fuerza rī, jíin jéē cácahān ndevāha ñayuu jíin rí, jíin jéē cúmanī nuū rī, jíin jéē cájito xeēn i ruhū, jíin jéē ndóho ri jñúndóho siquī Cristo. Chi jeē tú na fuerza maá rí, yúcuan sáha jeē nihín rī fuerza maá yá.

**Jeē nácani ni Pablo siquī ñayuu cácañíje ñuu Corinto**

<sup>11</sup>Te va tēe cánéé cúu ri jeē ni sátéyí nde ri maá rí. Te siquī jeē tu cácañíje ró rúhū, jeē yúcuan ní sátéyí rí maá rí. Chi cánuú jéē máá ró cuajnúhún ró ruhū nuú. Chi vésú tú jniñu ri jeē maá rí, te va tu núu cuiti nde ri nuū tāca tēe un jéē cácahān rō jeē apóstol cujéhu cácuu de. <sup>12</sup>Chi mēhñu ró ní sáha ri tācá jniñu jeē steén jeē cúu ndije ri apóstol. Chi jíin cuéhē paciencia ni sáha ri tācá jniñu jéhu jeē steén poder Yaā Dios, jíin táca jniñu jeē nahán ní canaa ni rō ni cajito ró. <sup>13</sup>Te tu ní sáha ri jeē núu ga cácuu ró núu tāca gá grupo ñayuu cácañíje, chi máá ñin-ni jeē tu ní stáhān rī rohó jéē cuáha ro jéē jíni ñúhún rí. Cone cáhnu ni rō núu súcuan ni sáha nde ri falta nuū rō víi.

<sup>14</sup>Te vijna je íyó túhva ri jecondēhe rí rohó vuelta unī. Te suni tú na vé cacán rī nuū rō, chi nasúú ndajniñu ró cúu jeē cuní rī, chi sa suhva jeē quendōo vāha rō

jíin jnúhun ya. Chi nájñuhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuāha de jeē quendōo vāha sēhe de. <sup>15</sup>Jeē yúcuan cúsiī ni rī stíhi ri jeē névāha ri, te nde stíhi ri fuerza maá rí, návāha sáha ri jeē quendōo vāha ánuá rō jijnáhan ró. Te manī gā coo ri jíin ró, vésú sanaa te jecu-ni cáhiyo manī rō jíin rí.

<sup>16</sup>Te íyó jecu rō cácahān jeē vésú tú na vé ni jícán rī nuū rō, te tēe stáhú cúu ri, chi ni nducú rí modo ndichí nihín rī xūhun ró, cácahān rō. <sup>17</sup>¿A táca tēe ní tají rí nuū rō, á ñin máá de ni stahú de rōhó jéē nihín de xūhun ró cuu máá rí, chí naún? Tú cuiti. <sup>18</sup>Ni cahān ndahú rí jíin Tito jeē jécondēhé de rōhó, te ni tají rí ñin hermano ni jeē jíin de. ¿Te chí ní stahú Tito rohó ní quihin de xūhun núu rō jeē cuu máá de, chí naún? Tuú chi inuú-ni cásáha ndíndúú rí, te ñin-ni ánuá ndíndúú rí.

<sup>19</sup>¿Sanaa te cájeni ni rō jeē cahán rī jnúhun yáha návāha quendōo vāha ri jíin ró, chí naún? Nasúu súcuan cúu, chi Yaā Dios jiní yā jeē cahán rī maá-ni jnúhun jeē cuní Cristo. Te ndíhi jeē cahán rī chi nducú rí jeē ije ró jíin jnúhun ya, ñáni mání. <sup>20</sup>Chi yúhú rí jeē núu na jéé rī, te sanaa te cuni rī jeē tu cásáha ró jniñu nújnahan ni rī. Te máá ró jijnáhan ró, suni ma nújnahan ni rō ruhū. Chi sanaa te cátejñáhan ró, cácuésún ni rō, cáquitī ni rō, cásándúxí ró, cásájñuhún ró, cácahān rō siquī jñáhan ró, cácutéyí ró, cájica néé ró. <sup>21</sup>Te yúhú rí jeē núu na jéé tucu ri te cuāha Yaā Dios jnúhun canu nuū

rī jeē súcuan casáha ró. Te sanaa te cucuíhyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo ró jniñu jnéhén jniñu jíca jnéni jíin jniñu néé ndasí ní casáha ró.

### Saludo jíin jnúhun cástūhun

Pablo jeē sándihí

**13** Yāha cúu vuelta unī jeē jécondēhe rí rohó. Te sándaā yō jniñu nájñuhun cáhán tutu: Jíin jnúhun jeē cahán uū chí únī testigo te cundaā tácá jniñu, áchí. <sup>2</sup>Te vijna jeē íne jíca rí te cáhán tucu ri nájñuhun ni cahán rī ná ni ine ri jíin ró. Cáhán rī nuū ñáyuu ni casáha cuēchi un jíin núu ndihí ró, jeē núu na jéé tucu ri te ma cóo vītá ni rī jíin ró. <sup>3</sup>Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmani fuerza yā jeē sándaā yā jíin ró, chi stéén yā poder yā mēhñu ró. <sup>4</sup>Te vēsú tu ní stéén yā fuerza yā ná ni jihí yā jicā cruz, te vijna chí técu yā jíin poder Yaā Dios. Te nájñuhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jíin poder Yaā Dios cátecu rī jíin yá jeē cuajniñu ri nuū rō jeē siquí jnúhun ya.

<sup>5</sup>Coto ndee rō maá ró núu cáhiin nihin ró jíin jnúhun cáchandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró? <sup>6</sup>Te ñúhun ni rī

jeē suni cáducáhnú ni rō jeē maá rí cáchandíje ndije ri. <sup>7</sup>Te cájicān tahu rī nuū Yaā Dios jeē ma sáha ró ni iin jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún ró, te tú na vé sáha, chí máni jeē na sáha ró jniñu ndaā cúu jeē cánducú rí. <sup>8</sup>Chi tu jési ri nuū jniñu ndaā, chí sa suhva scáca ri. <sup>9</sup>Núu súcuan te cácusihí ni rī núu tú na fuerza maá rí, te núu íyó fuerza maá ró. Te níni cácan tahu rī jeē na íje ga ni rō jijnáhan ró jíin jnúhun ya. <sup>10</sup>Te téé ri carta yáha nuū rō nde ná tu jeē rī, návāha núu na jéé rī te tuá jíni ñúhún cuxeēn rī nuū rō. Chi ni jēhe Jitoho yō jniñu ndíso ri yāha jéé sáha ri jeē íje ánuá rō jíin jnúhun ya, nasūu jéé snáá rī.

<sup>11</sup>Je ni cahán yō núu súcuan hermano, te na cóo jeē váha jíin ró jijnáhan ró. Te na cóndihvī ni rō ije ró jíin jnúhun ya, te coo ndeyí ni rō. Te na cóo inuú ni rō te coyūcu máni rō jíin jnáhan ró. Te Yaā ndíso jnúhun ndeyí sñi ni jíin jnúhun cúndáhú ni, coo ya jíin ró jijnáhan ró. <sup>12</sup>Te jeē cahán rō jíin táca jnáhan ró, te yíñúhún techūhu ró ndaha i. <sup>13</sup>Sándeyí ni rō jijnáhan ró, áchí hermano cáchandíje jeē cáyūcu yáha.

<sup>14</sup>Te ñúhun ni rī jeē Jitoho yō Jesucristo na sáha ga yā jeē váha rōhó jijnáhan ró, te Yaā Dios cundáhú ni yā rohó, te Espíritu Santo condee cáhnú ya jíin ró. Súcuan na cóo. Amén.